


1981

En memoria da

Giusep Deflorin-Lang, Selva/Baar



In bi di d'atùn. Bellezia sulegl dorava nos cuolms. Quei era la dumengia, ils 16 da november 1980. Biars automobilists, cunzun si dalla bassa, carra-van sur nos pass e gudevan la bial'aura. In da quels havein nus entupau, in da Selva che steva giu la bassa. Tgei plascher ch'el haveva aunc da visitar inagada sia stretga patria. Ei era quei: il Giusep Deflorin. Sesents a Baar, haveva el adina puspei plascher da visitar nies Tujetsch. Entupond in dall'annada 41 ha el detg cun plascher: «In auter onn vein nus curonta, lu fagein nus ina detga fiasta» Tgei plascher ch'el havess giu da far fiasta en la patria. Ei duevà par'ei buca esser ordinau. Ils 4 da december vegn

la tresta nova da Baar, che Giusep Deflorin seigi morts. Ina disdida dil cor ha fatg fin anetgamein ad ina veta schi robusta.

Giusep Deflorin ei naschius a Selva ils 20 da mars 1941. En la tgina gia isada da 11 fargliuns sauns e taffers ha era el survegniu sia dimora. Ses geniturs: Giachen Antoni Deflorin, da Tschamut, e Paulina, nata Venzin, da Selva, han tratg si cun in pign menaschi puril 12 affons. Da quels era era Giusep il giuven. 1949 han ils da Selva giu la sventira dil barschament da quasi tut il vitg. Quei ha tratg beinenqual famiglia ord il equiliber. Els havevan da quei temps piars tut deno il prau ed il muvel. Quei ha segir priu bia curascha e mess era ils geniturs e fargliuns da Giusep en embarass. Encurend fadigia, ha ei giu num da luvrar e barhar per puspei baghegiar si in avegnir.

Igl onn 1964 anfla Giusep ina piazza el cantun da Zug, nua ch'el fa enconuschientscha cun Anna Maria Lang e marida quella la primavera 1966. Ord la lètg neschan duas mattatschas. Ils geniturs tgiravan cun plascher lur affons. Mo tuttenina, surura, vegn la mort anetga dil bab.

Ussa ruaussan las restonzas terestras da Giusep sin il santeri dalla baselgia da s. Martin a Baar. Nus havein la speranza che il defunct hagi anflau la patria celestiala, nua ch'ei dat negin schar encrescher pli. Alla famiglia en malencurada nossa condolientscha ed al defunct la pasch eterna. d.r.